

佛祖心鑑貫註
禪淨雙勛

合編

余覺題簽



佛祖心燈貫註
禪淨雙勸 合

重印
流通
歡迎
代辦

民國二十年辛未歲冬月初版印五千冊

藏版處

蘇州護龍街南段
弘化社
穿心街報國寺內

國光印書局

印刷處

上海新大沽路丁四十號
國光印書局
電話三三七四三號

流通處

上海開北新民路中國慶路口
佛學書局

蘇州弘化社
上海貴州路一二五號
功德林佛經流通處

佛祖心燈禪淨雙勸合編流通序

佛祖心燈。亙古常明。禪淨理致。充塞法界。人各具足。何用讚揚。爲不_了者。重下註腳。梵網經云。一切衆生。皆有佛性。又云。汝是當成佛。我是已成佛。法華_者不輕菩薩見諸四衆。皆悉禮拜曰。我不敢輕於汝等。汝等皆當作佛。華嚴如來成等正覺歎曰。奇哉。一切衆生。皆具如來智慧德相。但因妄想執著。而不證得。若離妄想。則一切智。自然智。則得現前。是知衆生當體是佛。但以迷而未悟。及悟而未證。故不免仍作衆生耳。其令悟之法。莫過於參禪。卽所謂看父母未生以前本來面目者。乃令人向未動念以前。親見其主人翁耳。果能徹見。是名爲悟。然煩惱未斷。依舊莫出輪迴。若能斷盡世間煩惑。方可高超三界。是知證之一事。大非易易。以故不得不依信願念佛求生西方。以期仗佛慈力。帶業往生也。諦思此義。知如來特開淨土一門。不獨爲接引普通行人。實爲保護于宗子教。有所悟證。而未至凡情聖見俱不可得。煩惑淨盡。條然解脫者。夫已悟已證。未至其極。若無淨土法門爲之保護攝持。則此諸行人。再經

受生沈沒者居多。而進修者甚少矣。感佛恩德。不禁令人哽咽涕零。了然大師宿根深厚。從初出家。卽志宗乘。苦參力究。得其旨歸。以七佛及西竺東震三十三祖偈文深義奧。殊難領會。因爲貫註。稍增字句。義便彰明。遂名之爲佛祖心燈。嗣後雲遊諸方。研窮經論。始知淨土法門。實爲諸佛諸祖究竟自利利人之甚深法海。一切諸法。無不從此流出。無不還歸此法。遂生眞信。而力修持。以期卽生往生。克副初衷也。閒有發揮禪淨理致。語語確切。發人深省。乃名之爲禪淨雙勛。雖仍提倡禪宗。實則注重淨土。以期已悟證。未悟證者。同得卽生了脫也。其友德森大師。欲爲排印流通。祈余審定。及敘其意致。乃撮舉其要而述之。所惜語意校深。普通初機人。未能一閱直下明了耳。然接引初機之書甚多。固未可爲歉憾也。然亦可令參禪未得悟證者。得其卽生了辦之道。其有益于禪者大矣。願見聞者。同生信焉。

民國二十年辛未孟秋古莘常慚愧僧釋印光撰

佛祖心燈貫註禪淨雙勛合編自序

如來實相果海。本來生佛一如。豈容纖毫分別。但以如來證果。久住涅槃。衆生迷真。常淪生死。由是升降千差。智愚萬別。根有大小。慧有淺深。如來於大涅槃。運大悲心。乘大願力。出現世間。頓說漸說。乃至種種方便說。原來總皆引導衆生。同歸實相。是故楞嚴經云。歸元性無二。方便有多門。今舉如來一代時教。於不二中。取其至統攝無遺。一真獨顯者。唯有禪宗明心見性也。於方便中。求其最圓頓直捷。三根普被者。無如淨土持名念佛也。蓋此淨門弘開。原有無上因緣。所謂如來於實相海中。徹知徹見。深愍末世道風衰微。衆生慧根淺薄。縱有發心參求。於明心見性之實相妙理。少能悟入。縱能悟入。罕獲親證。然既未悟未證。欲了生死。豈可得乎。縱使悟而能證。若有絲毫惑業未盡。猶須復受後身。所以大集經云。末法億億人修行。罕有一人得道。唯依念佛得度生死。如來因斯欲暢本懷。悉作衆生得度因緣。於實相中。特開淨土念佛一門。普教衆生。執持阿彌陀佛名號。無論悟與未悟。證與未證。上智下愚。乃至十惡衆生。禽獸鱗甲等。但具真信切願。終身不退。便可仗佛慈力。接引往生極樂。

淨土。既得往生。見佛聞法。即能了悟無生。實無生。即相理。從茲進修。直至無上菩提。據此觀之。我等生逢末世。應當深信佛言。欲求即生了辦。永脫輪迴。超登不退。直至菩提。除此淨土念佛一門。更無可得。普願同倫。各宜力修。余因早年習禪。嘗閱佛祖傳法偈。每一展讀。處所渾忘。身心若失。深信佛祖慧命。衆生本覺。諸經妙義。萬法真源。莫不總在其中。契合圓融。非一非異。特歎文奧義幽。殊難領會。因是不揣愚陋。每偈即按本義會之。至難通處。略加數字。而直貫其文。以便順讀。末以數字註之。而總攝其義。使簡約易持。名佛祖心燈貫註。唯以一時自便。非敢出以問世。後因大病。知自力微劣。不易抵敵死魔。若仗佛力。則何幸如之。於是遂專心念佛。近年於念佛之暇。復述有淨土諸文。專談禪淨理體。並論自力佛力之難易。命名禪淨雙勸。而與前註編成一帙。意謂淨土法門。以實相爲體。信願行爲用。前註專明體。後文兼達用。理事雙運。權實並行。依此修持。可階上品。乃常置案頭。以便自習。去臘因同學德森大師。在報國印公處。佐助校對。來函索去。請公鑑正。排印流通。余以德兄爲法情殷。利人心切。

復得印公慈允鑑定。實屬大幸。不敢固卻。但愧學識淺陋。文義粗疏。不能發揮禪淨奧妙。唯將自己發心以來。歷境逢緣之實事相告云耳。惟願讀者。幸勿哂焉。時維民國二十年歲次辛未二月。觀音大士誕日。沙門了然。今淨熏沐。述於普陀佛頂之閱藏樓。

佛祖心燈貫註禪淨雙勛合編發刊序

正法眼藏。不落言詮。非言詮無以表示。涅槃妙心。本離文字。須文字始得宣揚。若徒執實相無相。撥棄文言。其理雖衆生本具。其意實無由啓發。衆生又何能領會也哉。所以善說般若者。分實相觀照文字三種般若之名。令人了解文字。進修觀照。觀照得力。自然漸證實相。此可謂善會佛意。善化衆生者矣。但祇教人因指見月。得魚忘筌。卽一切法。離一切相。始能契悟諸法實相。深知文字性離。卽文字而不著文字。能由文字了達佛意。了悟自心。稱性起修。全修在性。庶不被文字葛藤所繫縛也。佛祖心燈之四十首偈。始自七佛。終至六祖。每偈四句。文約義豐。言簡理備。乃佛佛祖祖。

以心印心。表示正法眼藏。涅槃妙心。實相無相。微妙法門。離文字相之文字也。惜我等生茲末世。去聖時遙。人根陋劣。不但實相妙理難以悟入。卽如此幽玄言句。亦不易會通。了然淨大師。參究有年。頗有心得。既契佛旨。思報佛恩。欲報佛恩。正須覺悟羣品。爰以四十首偈。一一貫註。令人容易了解。因文會意。因指見月。俾各各外慕諸聖。內重己靈。切實精修。同歸覺路。所謂佛恩祖恩並報。自身他身等度矣。此註於民十脫稿。森卽隨師雲遊。曾呈當今僧中泰斗。觀宗諦老。普陀印老。印老在普陀法雨住三十餘年。至民十九。始來蘇州報國掩關。看過。均蒙贊許。並勸以念佛。卽今付排流通。復請印老於關中詳爲審定。加以序引。其利益如何。明眼人展卷自知。不須重贅。但師與森之一段因緣。有不容不借此以披露者。何也。師與森同壇稟具。故外人皆目我二人爲同參。詎知其正是森之方便接引。策勵誘掖之教導師也。師宿根深厚。般若力充。生死心切。出家受具。卽屏絕外緣。專辦己事。故得早明心地。修持得力。森業障深重。福慧全無。雖有信心。悠悠泛泛。加之專理表面。喜聞外事。因循虛度。唐喪光陰。幸民二分袂。民五重逢。

繼常隨師學。少離左右。經十餘年。得師切實警勵。始將喜聞外事等雜亂習氣。漸漸擺脫。今於佛法。雖如盲人摸象。未識廬山真面目。而粗知端倪。略染識田。作金剛種。實由師十餘年來策勵啓迪之所致也。民十以來。與師同承誦印。二老慈訓。乃自量己力微薄。非仗佛力。決無了生死分。遂死盡偷心。依教奉行。息心念佛。專求往生。將從前稍事熏染之般若種子。及斷惡修善。慙愧懺悔。一切毫末功德。悉作淨土助緣。唯期仗佛慈力。帶業往生。決定今生。了脫爲目的。是師與森之同願。森近年復承印老慈攝。常命佐助校對事宜。故對排印流通各手續。頗知頭緒。乃敢函索師之註本。及勸禪者專修淨業諸文稿來。商請印老審定。及略告蓮友。稍集淨資。爲之印行。以作佛恩祖恩。與我師教導之法乳深恩。一齊普報。並以此功德。回向法界衆生。同歸淨土法門。共入彌陀願海也已。時維民國二十年辛未歲。

觀音大士誕日心許受法

弟子

德森熏沐和南敬序於蘇州報國清衆室

跋

按體例。跋本列於全書之後。今因此跋。實有決擇禪淨之趣向。補助全書所未發。故列此。俾閱者於未閱全書之前。卽知其所宗趣。

己巳秋拙著歷史感應統紀告成。呈師座印公鑑定。師以世變日熒。卽付梓流通。時襄助校讎者。唯德森師。備極勞瘁。余深感之。而初未謀面也。庚午秋。赴蘇謁師座於關中。得晤森師。詢爲鄉人。由儒而釋。發心真實。遇事精細。情益洽。然不數日卽別。今忽忽一年矣。久不親善知識。塵染日增。忽奉寄示了然師佛祖心燈貫註及宏揚淨宗諸論贊。披誦一過。喜了師旣已深入宗門。與佛祖心心相印。而又卓具法眼。知仗自力。決不如仗佛力之直捷而穩當也。以文字般若。牖啓後學。鍼砭狂禪。勸進念佛。是書也。洵可謂宗通說通。上契佛心。而下利羣品者矣。宗下之士。肯回心念佛。旣以般若火燒去煩惱薪。則心易一而念易純。如毒藥已盡。好貯甘露。縛繩已解。驀直西行。永明料簡。有禪有淨。當來佛祖。豈非禪定之功。得淨土而益彰乎。是此書大有裨於禪人。而森師發願流通。誠善於報德也。抑有進者。禪宗貴乎兼淨。而淨宗決不宜夾禪。能眞信念佛法門。至妙至穩。惟當欣淨厭濁。求出生死。仗佛願力。接引生西。而於宗門知見。所謂無取無捨。非垢非淨。生死了不相關。彌陀不離自性。念歸無念。生

卽無生種種義解。必須盡力吐棄。不許涓滴遺留。以完成專仗他力法門。得受感應實益。儻一念捨佛取心。法流卽不相接。而提起念佛是誰。將全幅信心。變作疑情。尤爲醍醐中置毒藥。爲念佛法門之生對頭。死怨家。禪淨夾雜。兩敗俱傷。此中關頭。不可不辨。質之諸師。以爲何如。辛未仲秋淨業學人許止淨敬跋

目次

佛祖心燈貫註

此爲前編○附壇經二處解釋

禪淨雙勛

此爲後編○內分十子目詳列於後

心佛圓通頌

持名功德不可思議說

讚六度偈各一首

勘明所悟念佛論

念佛三昧殊勝論

讚菩提涅槃彌陀安養偈

參禪悟後正宜念佛論

念佛三昧圓頓觀

附觀法數則

共四首

禪淨雙修偈

人命在呼吸間不可不知

讚馬祖道一禪師真

般若本具淨土說

西方安樂銘

佛力呪力護生靈驗記

淨土能護宗教說

夢中霹靂

附錄華嚴經依普賢願王得生極樂

行願品普賢菩薩於逝多林末會發十大願王。其一願皆云。虛空界盡。衆生界盡。我此大願。無有窮盡。是人臨命終時。最後刹那。一切諸根。悉皆散壞。一切威勢。悉皆退失。輔相大臣。宮城內外。象馬車乘。珍寶伏藏。無復相隨。唯此願王。不相捨離。於一切時。引導其前。一刹那中。即得往生極樂世界。到已。即見阿彌陀佛。其人自見生蓮華中。蒙佛授記。得授記已。經無數劫。普於十方。不可說不可說世界。以智慧力。隨衆生心。而爲利益。乃至能於煩惱大苦海中。拔濟衆生。令其出離。皆得往生極樂世界。又下偈云。願我臨欲命終時。盡除一切諸障礙。面見彼佛阿彌陀。即得往生安樂刹。我既往生彼國已。現前成就此大願。一切圓滿盡無餘。利樂一切衆生界。

再附文殊發願經文殊發願求生極樂

願我命終時。滅除諸障礙。面見阿彌陀。往生安樂刹。生彼佛國已。成滿諸大願。阿彌陀如來。現前授我記。嚴淨普賢行。滿足文殊願。盡未來際劫。究竟菩薩行。

佛祖心燈貫註

印光法師審定

沙開子然著

毘婆尸佛

過去莊嚴劫第九百九十八尊 偈曰

身從無相中受生。猶如幻出諸形像。幻人心識本來無。罪福皆空無所住。

此謂父母未生以前。性體本來空寂。畢竟無有形相。一切身相。從無相中不覺一念妄起。各假因緣和合受生。猶如夢中。幻出諸般形相。當知幻人心識本來無生。其罪福亦復皆空無所住矣。○心生法生。心滅法滅。心法滅已。性體虛明。

尸棄佛

過去莊嚴劫第九百九十九尊 偈曰

起諸善法本是幻。造諸惡業亦是幻。身如聚沫心如風。幻出無根無實性。

此謂真實性中。無有起滅動念。即乖。故起諸善法本是幻妄。造諸惡業亦是幻妄。但身如聚沫。其心如風。雖然幻出。畢竟無根。無有實性。○真實性中。本無諸幻可得。寂照一如。莫能思議。

毘舍浮佛

過去莊嚴劫
第一千尊

偈曰

假借四大以爲身心。本無生因境有。前境若無心亦無。罪福如幻起亦滅。

此謂妄情無體。假借四大以爲身心。本無生。皆因境緣起惑。不守最初。至有憂悲苦惱。食息無安。直下前境若無。其心亦無。運行自在。故知罪福如幻。忽起忽滅矣。○非但心因境有。亦乃境屬心生。何以故。心若不異。萬法如如。

拘留孫佛

現在賢劫
第一尊 偈曰

見身無實是佛身。了心如幻是佛幻。了得身心本性空。斯人與佛何殊別。

此謂當觀色身無實。原假地水火風和合而成。終歸散滅。無有住所。無住之身。卽是諸佛解脫清淨之身。復悟諸心如幻。畢竟虛無。雖化羣生。不存法想。是名諸佛無爲妙幻。苟能悟得身心悉皆無所。本性浩然空寂。吾道斯人。則與諸佛有何殊別。○身心無所全體空寂。空無異相。何殊別乎。

拘那含牟尼佛

現在賢劫
第二尊

偈曰

佛不見身知是佛。若實有知別無佛。智者能知罪性空。坦然而不怖於生死。

此謂佛本無相。不可見身。而衆生各自具有靈知智性。清淨圓明。纖毫無異。卽是諸佛之性。若人實悟自有靈知智性。清淨圓明。離此之外。別無佛性。是故智者一念承當。疑情永滅。了知罪性本空。心常坦然。不生怖畏。畢竟離於生死。○見性之人。如師子王。百獸遠離。何以故。不與萬法爲侶故。

迦葉佛

現在賢劫
第三尊

偈曰

一切衆生性清淨。從本無生無可滅。卽此身心是幻生。幻化之中無罪福。

此明性體本空。無有自他。離諸名相。如來方便。欲令解悟。故謂一切衆生性體清淨。從本以來。前際無生。後際無滅。而卽此身心。猶如浮漚。速起速滅。無有實性。原是幻生。其幻化中。畢竟空寂。實無罪福。○如來方便如此。無非教人虛心息妄。了達眞宗耳。

釋迦牟尼佛

現在賢劫
第四尊

偈曰

法本法無法。無法法亦法。今付無法時。法法何曾法。

此謂心乃諸法之本源。本源法者。超然清淨。無有少法可得。莫以清淨無法可得。便說本法斷滅。須知諸佛相傳。亦此法也。故今付汝清淨無法可得之時。法法體皆空寂。何曾見有實法耶。○佛佛相傳。唯以心印心。心心不異。清淨莫得。故無實法也。

摩訶迦葉尊者

天竺
初祖偈曰

法法本來法。無法無非法。何於一法中。有法有非法。

此謂心乃世出世間法法之本。本來法者。畢竟真實。無有是法非法。云何智者。復於真實一法之中。見有法與非法耶。○本法非相。原無是非可得。真實一如耳。

阿難尊者

天竺
二祖第
偈曰

本來付有法。付了言無法。各各須自悟。悟了無無法。

此謂法離諸相。不可取得。假名本來付有心法。蓋今付了。實言無法。智者善知。凡

情莫測。至囑各各切須努力自悟。悟了方知心卽超然。亦無無法也。○付者假名。故不說有。悟了心達。豈復著無耶。

商那和修尊者

天竺第三祖

偈曰

非法亦非心。無心亦無法。說是心法時。是法非心法。

此謂至理超然。絕諸名相。故非法而亦非心。既無心法之名。亦無心法可得。蓋今說此微妙心法之時。而此法非能所之心法也。○心法既空。能所何存。誠哉。可謂微妙第一義諦。思議莫及。

優波鞠多尊者

天竺第四祖

偈曰

心自本來心。本心非有法。有法有本心。非心非本法。

此謂心自本來是心。豈假造作。求之不得。棄之弗離。卽此本心。猶如虛空。皓然瑩徹。非有一法可得。若言有法可得。有心可受。則不名諸佛之心。亦非本源之法也。○心本虛通。更有何法。若作法想。卽是根塵。而非本心法也。